

Joerg Spescha per la communicaziun d'interpresa

■ (Ir) Diana Joerg Spescha (49) è da nov responsabla per la communicaziun d'interpresa da la Lia Rumantscha (LR). Cun questa nova piazza vul la LR render enconuschentas sias activitads ad in public pli vast. A partir da l'avrigl 2014 è Diana Joerg Spescha responsabla per la communicaziun d'interpresa da la LR. Cun crear questa piazza parziala reagescha la LR sin las pretensiuns creschentas a la communicaziun, surtut en il champ dal marketing da products e da las novas medias. «Noss products e projects èn tematizats e formalmain fitg multifars, els sa drizzan tant ad in public regional sco era naziunal. Perquai duvrain nus insatgi che coordinescha l'entira communicaziun da l'organisaziun», motivescha Urs Cadruvi, secretari general da la LR, il rinforzament da la communicaziun d'interpresa.

Diana Joerg ha cumenzà sia carriera schurnalistica il 1991 tar Radio Grischua a Cuira. Pli tard ha ella lavurà tranter auter per Tele 24 a Turitg. A partir dal 2001 è ella stada collavuratura da Schweizer Radio und Fernsehen, l'emprim sco redactura e moderatura da SF, pli tard sco moderatura da DRS 1 (oz SRF 1). Là ha ella era produci emissiuns sco «Treffpunkt» e «Zeitreise». L'onn 2010 è Diana Joerg turnada a Cuira tar il schurnal regional da radio SRF.



Diana Joerg Spescha è da nov responsabla per la communicaziun da la LR.

MAD

Sco producenta è ella tranter auter stada responsabla per la concepziun da las emissiuns. Plinavant ha ella manà il ressort per la cultura en il Grischun.

Diana Joerg è creschida si a Domat en in ambient rumantsch. Ella è maridada e mamma d'in figl creschì. Diana Joerg sa le-

gra da sia nova sfida: «En questa funcziun poss jau duvrar mia lingua materna e lavurar cun ella. Per mai èsi impurtant ch'ins percepeschia pli fermamain la quarta lingua naziunala e la cultura rumantscha sur ils cunfins dal chantun – era suentar il success dals Rumantschs a Sotschi.»